

Kapitulo 2

E bèrdat ku a sali Herúsalm pa tur nashon

"I boso lo konosé e bèrdat i e bèrdat lo hasi boso liber." Juan 8:32

No ta eksisti niun hende realmente liber i esei lo keda asina te ora ku e persona konosé e bèrdat. E libertat ku Hesus ta referi na dje aki, ta solamente den dJE por hañé pasombra E ta e kaminda, bèrdat i bida.

E proseso pa libertat ta kuminsá ku e palabra di Señor. David a yam'é "Un lampi pa nos pia i un lus pa nos kaminda." E palabra di Señor ta e Beibel ku ta kontené e bèrdat ku ta hiba na e konosementu di Dios i e komprondementu ku Dios no ta responsabel pa e konfushon religioso ku tin riba e mundu aki. Dios ta lus i no skuridat. Lus ta representá klaridat i órden, no e bruashon i desórden religioso aki. Miéntras tantu ku nos ta sigui pone Dios responsabel pa e konfushon aki, nos no ta realmente liber. Libertat nos ta eksperenshá na momentu ku nos mira Dios manera E ta. Esei ta e libertat ku Hesus ke duna ser humano.

Nos orashon mester ta, pa Dios yuda nos haña e bèrdat ku a sali Herusalém. Nos tur sabi ku mas o ménos 2000 aña pasá e evangelio a sali Herusalém pa tur nashon. Dios ta Todopoderoso pa kumpli ku Su promesa di laga e evangelio i e liberashon yega na tur nashon.

For di den Téstamént Bieu, Isaias a bisa ku e seru di e kas di Señor lo ta estable sí komo e seru prinsipal i tur nashon lo basha bai na dje. (Isaias 2:1-3) Isaias no a referi na un seru literal, aki e ta papiando di e bèrdat ku a sali di Herusalém ku lo ta halsá riba tur e siñansanan robes ku tin den e mundu aki. E palabra di Señor ku a sali for di Herusalém ta kompañá pa e lei ku ta sali di Sion, esta esun di libertat. (Santiago 2:10 -12) Esaki ta loke Isaias ta referi na dje. E lei aki ta hasi nos liber.

Na momentu ku nos haña e bèrdat, e promé libertat, e ta halsa nos riba e eroman i nos no ta katibunan mas di eror; e ta pone nos den e posishon ku nos ta siña otro. No pasombra nos ke, ni pa orguyo óf pa terkedat, sino pasombra boka di Hesus a bisa esei. Nos ta liber i sin ningun esfuerso, nos lo ta siñadónan formá pa honra i gloria di Dios mes.

Lukas ta papia di libertat for di nos pikánan. (Lukas 24: 47) Tur nashon por haña pordon di piká den e nòmber di Hesus, prediká den e evangelio ku a sali Herusalém. Otro evangelio ku no ta esei ta un mentira den nòmber di Hesus. E kombinashon di Hesus huntu ku mentira no ta funshoná. P'esei Lukas ta spesifiká kua evangelio.

Apóstel Juan ta duna un relato kompletu di e enkuentro di Hesus i e muhé samaritano. (Juan 4:7-26) Un gran pleitu a separá e pueblo di Israel den dos. Dies tribu a bai Samaria i dos tribu (esnan di Juda i Benjamin) a keda Herusalém. E dies nan ku a bai Samaria a hiba e evangelio ku nan tabata praktiká na Herusalém

ku nan, i a lanta un sede riba e seru di Samaria. Hesus ta mostra e dama aki, ku nan no sabi kiko nan ta adorá pasombra salbasyon ta bini di e hudiunan. E dies tribunan a kere ku si nan bai ku nan doktrina kompletu, Dios lo asepté nan adorashon. Dios no ta aseptá ningun divishon. Tambe e dies tribunan a lubidá ku e evangelio ta ankrá den profesianan. Ku tur e profesianan di Hesus lo a sosodé na Judea i ku Dios no tin otro sede pa salbasyon ku no ta Herusalém. Ta pa e mes rason aki na momentu ku Juan a haña e vishon di e stat selestial e no a mira ningun otro sede. (Revelashon 21:2) Ni esun di Samaria, ni esun ku mundu ta kere den dje awe. Apesar di tur e maldatnan ku Herusalém a hasi kontra Dios, tòg ta e mes, Juan ta mira baha for di shelu manera un brùit dòrná pa su esposo. Tur e santunan di tur tempu ku a gloria Dios i Su stat santu Herúsalm, lo lanta di morto i mira e stat santu di Dios i nan lo alegrá (Mateo 5:35) meskos ku Abraham (Hebreonan 11:8-10). Si tur e santunan a spera Herúsalm nobo lo no por tin un otro stat.

Hesus ta ordená Su disipelnan pa keda den Herúsalm te ora ku nan haña forsa di ariba. (Echonon 1:4,8) Nan no tabatin pèrmit di sali, pasombra e evangelio "kompletu" mester a sali for di Herusalém. Ningun otro nashon mester a pone òf kita algu for di e evangelio ku mester a sali Herúsalm.

E apóstel Pablo ta spièrta e romanonan fuertemente pa nan tene kuenta ku e hudiunan ta promé. (Romanonan 1:16,18) Pablo ta deklará ku e "no tin bèrgwensa di e evangelio di Hesu-Kristu, pasombra e ta poder di Dios pa salbasyon di tur ku ta kere." Hopi ta esnan ku ta bai pèrdí pa motibu di bèrgwensa di e evangelio di Hesus. Pablo ta bisa ku ta den e evangelio ei e hustisia di Dios ta deskubri. Ta te na e momentu ku hende konosé e bèrdad di e evangelio ku e ta kapas di rekonosé e hustisia di Dios. Ademas di libertat, e konosementu di Dios Su hustisia, tambe ta un benefisio ku e bèrdad ta ofresé.

Segun Pablo ta bisa (Romanonan 2:10,11), tur hende por haña honor i gloria, pasombra Dios no ta hasi distishon di persona, pero e hudiu ta keda promé pa motibu di Abraham. (Romanonan 3:1,2) Remarkabel ta ku Pablo ta enfatisá ku hudiu ta promé diferente biaha. E Palabra di Dios a wòrdu konfiá na e hudiunan i no na ningun otro nashon.

Beibel ta rechasá un otro evangelio kategórikamente. (Galationan 1:8,9) No por tin ni un minimo cambio den e evangelio. Pablo ta deklará ku maske ta un angel anusiá un otro evangelio e sea maldishoná. Un angel maldishoná no ta nada otro ku un diabel. Esaki ta pa demostrá ku Dios no ta tolerá ningun cambio na e evangelio. Pa salbasyon, nos orashon mester ta pa Dios yuda nos haña e bèrdad ku a sali Herusalém. Nos ta bira liber ora ku nos komprondé ku Dios no ta responsabel pa e konfushon ku tin riba e mundu aki. Hesus a primintí ku si nos asepté i siña otronan e evangelio di Hesus, E mes lo ta ku nos tur dia te na fin di mundu. (Mateo 28:18-20) Rabia di Dios ta wòrdu manifestá di shelu kontra tur

paganismo i inhustisia di hendenan ku ta stroba e bèrdat pa via di nan inhustisia. (Romanonan 1:18)

Predikamentu di otro evangelio ku no ta esun ku a sali di Herúsalem, ta resultá den atake kontra e bèrdat, i rabia di Dios a bini riba mundu. Nos mundu awe ta wòrdu ataka pa droga, yunan desobediente, enfermedatnan manera aids i asta den naturalesa nos ta haña ku e kapa di ozon ta kibrando. David ta pidi Dios pa sostené segun Su palabra pa e por biba, mustrando ku bendishon di bida ta mará na e rèspèt di Dios Su estatutonan. (Salmonan 119:116,117)